

JONES, JOHN ('Mathetes'; 1821 - 1878), gweinidog Bedyddwyr a llenor

Enw: John Jones
Ffugenw: Mathetes
Dyddiad geni: 1821
Dyddiad marw: 1878
Rhiant: Mary Jones
Rhiant: Roger Jones
Rhyw: Gwryw
Galwedigaeth: gweinidog Bedyddwyr a llenor
Maes gweithgaredd: Crefydd; Llenyddiaeth ac Ysgrifennu
Awdur: Benjamin George Owens

Ganwyd ym Mancyfelin, Cilrhedyn, 16 Gorffennaf 1821, plentyn hynaf Roger a Mary Jones, a'i fagu yn Nhanyrhelyg, Cenarth. Aeth i'r gwaith glo yn Nowlais yn 1837 ac ymaelodi yno yn eglwys y Bedyddwyr yng Nghaersalem yn 1839. Traddododd ei bregeth gyntaf yn Hirwaun yn 1841, ac aeth i Goleg Hwlfordd yn Awst 1843, wedi cwrs byr o addysg yn ysgol ramadeg Aberteifi. Ordeiniwyd ef ym Mhorthyrhyd 27 Mai 1846, a symudodd i'r Deml, Casnewydd, 1854, Llangollen (yn gyd-weinidog â'r [Dr. John Prichard](#)), 1857, Llanfachraeth (Môn), 1859, y Pil (Morgannwg), 1861, Penuel, Rhymni, 1862 (gyda Siloam, Tafarnau-Bach, 1871-5), a Llansawel (Briton Ferry), 1877. Bu farw yno 18 Tachwedd 1878, a chladdwyd ef yn y Pant, Dowlais. Priododd deirgwaith, a ganed iddo chwech o blant.

Yr oedd yn llenor o fri. Bu'n fuddugol droeon ar draethodau eisteddfodol gan gynnwys traethawd ar ' Adnoddau Mwnawl Gogledd Cymru ' yn Llangollen, 1858, a chyhoeddodd lawer iawn o ysgrifau, yn arbennig yn *Seren Gomer*. Cyhoeddodd hefyd *Y Bedydd Cristionogol a Thaenelliad Babanod*, 1863, a *Pregeth i Fyfyrywyr Coleg Hwlfordd ...* 1865, ac *i Fyfyrywyr Coleg Pontypwl ...* 1870 [1871], ond cofir ef orau am ei *Geiriadur Beiblaidd a Duwinyddol* (3 cyf. 1864-9-83) a'i *Areithfa Mathetes*, 1873. Bu'n gyd-olygydd *Y Greal*, 1857-9, a'r *Arweinydd*, 1869-70.

Gweithiodd yn galed hefyd dros ddirwest ac addysg. Cododd ysgol rad yn Llanfachraeth, ac etholwyd ef ar fwrdd ysgol Bedwellty yn aelod yn 1871 ac yn is-gadeirydd yn 1874. Cedwir cyfrol o'i bregethau yn N.L.W. MS. 691.

Awdur

Benjamin George Owens

Ffynonellau

D. Bowen ('Myfyr Hefin'), *Cofiant y Parch. John Jones, 'Mathetes'* (1921), 1921

Oxford Dictionary of National Biography

Walters, *Arwydd o Barch i Ddewrion Bedyddiedig sef, y diweddar barchedigion John Jones (Mathetes), Llansawel, a Daniel Davies, D.D., Llanelli*, 1879

Watkins, *Tlysau Awen sef, cyfansoddiadau John Watkins (Ioan Gwent), Rhymni*, 1880

Seren Gomer, 1882, 1884, 1912

Y Geninen, 1922

Darllen Pellach

Erthygl Wicipedia: [John Jones](#)

Dolenni Ychwanegol

Wikidata: [Q18084617](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

